

հողերը խլում-յափշտակում են մի քանի դօրաւոր ու ագահ բէկերը. իսկ ես՝ այդ դժբաղդ ժողովրդի որպէս հարազատ որդի, իմ սրբազան պարտքս եմ համարում բողոքել այդ անիրաւութիւնների դէմ և իշխանութեան խորին ուշադրութիւնը հրաւիրել կատարուած յանդուգն զեղծումների մասին: Վասն զի դժբաղդ Հայ ժողովուրդը այլևս ապրելու հնար և միջոց չունի, ուրիշ մօտակայ գաւառներում էլ ազատ հող չկայ, ուր նա կարողանար գաղթել և նոր բնակութիւն հաստատել *): Ընդհանրապէս Ուտիացոց աշխարհի բոլոր երկրագործ գիւղացիք թաղուած են ծանր պարտքերի տակ, մինչև իրենց կոկորդը, որոնցից ազատուելու ո՛չ մի հնար չունին: Որովհետև, ինչպէս ասացի, նրանց դառն աշխատանքների արդիւնքները բէկերն են յափշտակում, նրանց ուղն ու ծուծը անխիղճ վաշխաւուններն են ծծում անյաղ տղրուկի պէս: Ընտիր յատկութիւններով օժտուած մի բուռն ընտիր երկրագործ Հայ ժողովրդին թողնել իրենց անողոք ճակատագրին, բոլորովին անխոհեմութիւն ու անխղճութիւն է ամեն մի բանիմաց և զգայուն Հայի կողմից: Այդ դժբաղդ

*) Բագուաբնակ Հայ կալուածատէր Սաաքել-ապէր Մատուրեանի և Գրիգոր-ապէր Դիլդարեանի հետ մի քանի տարի առաջ երկաթ ու բարակ զրաւոր բանակցութիւն սկսեցի, որպէսզի հողից զրկուած 45—50 տուն Հայ գիւղացիների բնակութեան համար հողաբաժիններ տան իրենց ընդարձակ ազարակներում որոշ պայմաններով: Բայց բարեսիրտ երկու Հայերը ես՝ իրենցից տնկալս արգելադրիթ պատճառներով իմ յոյսերս ի գերե հանեցին...